

STATÛT

PROVINCIE DI PORDENON

NOTIS STORICO-CULTURÂLS

La preistorie pordenonês e ven fûr cun insediaments tra i plui antîcs di dute la region, che a remontin al Paleolitic di mieç-superiôr; il Neolitic po dopo si à imponût ae atenzion de specifiche culture nazionâl; a continuin a jessi scuvierts sîts leâts ae civiltât paleovenite e a chê, vignude dopo o ben imponudesi parsore, clamade celtiche o celto-cjargnele o, plui in curt, cjargnele; propit intant di cheste protostoria il Friûl pordenonês al cjape su une sô specifiche configurazion dentri de *Carnorum regio*, tant che aree di incrosadure e di sintesi tra lis dôs culturis, la cjargnele a soreli jevât e la paleovenite o venetiche a soreli a mont.

La romanizazion dal teritori pordenonês, sierât a tramontane di chei rilêfs prealpîns che a lunc i scritôrs latins a clamarin “montes opitergini”, plui che in rapuart cun la fondazion di Aquilee (181 p.d.C.) e va leade cun Opitergium (Oderzo).

Dut câs, il fat plui impuartant pe storie locâl al fo la fondazion di Julia Concordia intune date ancjemò no ben precisade, salacor dal 42 p.d.C.: al è stât in chê volte che a forin centuriadis lis tieris de basse, jenfri Pordenon e Concuardie; somee di podê ricognossi une microcenturiazion vignude dopo inte fasce dal Tiliment jenfri Sant Vît e Spilimberc; une altre, che cualchidun al scrupule preconcuardiês, e je stade viodude intal Sacilês; inte alte planure, invece, somee che l’insediament roman al vebi puartât ae creazion di latifonds e *villae*. Dut câs i reperts di ete romane a mostrin che l’insediament al jere une vore penç inte zone des risultivis, jenfri Sacîl, Pordenon e Sant Vît, cun centri a Tôr, sît archeologic preroman, roman e paleocristian di straordenarie impuartance.

Altris avveniments fundamentâi pe leture dal teritori a son stâts: la istituzion de diocesi di Concuardie intôr dal 381-386 jenfri Livemce, Tiliment, Cjargne e mâr Adriatic (intant de vuere langobart-bizantine, dal 615-618 une part dal clero concuardiês al distacà il teritori di Cjaurîs, che al è finît inte diocesi di Vignesie); la distruzion di Concuardie romane e paleocristiane e, dal 589, la sô sparizion sot di une alte cuvierte diluvionâl; la fondazion, intôr dal 730-735 par opare dai Lanbobarts, de badie benedettine di Sante Marie in Silvis a Sest dal Reghine, destinade a diventâ un dai plui impuartants centris monastics de region e a tornâ a cjapâ sù, dopo cinc seculi di fisc e di bandon, la ricostruzion, la riorganizazion teritoriâl dal Friûl occidentâl.

La graduâl creazion, inte Europe carolingje e otoniane, dal stât feudâl clamât Patriarcjât di Aquilee (fat fissât par convenzion al 1077), al à cjapât dentri naturalmentri ancje il Friûl occidentâl, dividût intune vincjine di feuts minôrs incjistiellâts, ma cu la aree propriamentri pordenonês, dal secul IX *enclave* e *corpus separatum* vie vie bavarês, carintian, staiar,

asburgjic. Dut câs, la impuartance e la particularitât dal Friûl occidentâl dentri dal Patriarcjât a son dimostradis ancje de fate che, intal Parlament de Patrie, i prins puescj i spietavin pai feudataris ecclesiastics al vescul di Concuardie, pai laics ai conts di Purcie e Brugnera, di Prate, di Pulcinic e Fane, e ai consorts di Spilimberc; tra lis comunitâts e jerin rapresentadis Sacîl, Puartgruâr, Sant Vît, Davian, Cjanive, Midune.

La relative marginalitât rispjet al cûr prin cividalês e po dopo udinês de Patrie, e insiemit la vicinanza al mont venit-padan e i rapuarts economics cul mont toscan, emilian e soreud lombart, a judarin la precocitât dal autonomisim comunâl: i statûts di Pordenon e di Sacîl salacor a son i plui antîcs de regjon. Cun cheste stesse particolâr posizion gjeografiche e culturâl o vin di meti in relazion personaçs sicu intal secul XIV Duri di Pordenon (il plui grant viazadôr e relatôr di viaç in Estrem Orient dopo dal Polo), intal secul XV Pieri dal Çocol (o Capretto o Haedus, il plui grant umanist furlan), intal secul XVI Zuan Antoni de Sachis clamât “Il Pordenon” (il plui grant pitôr dal Friûl di ducj i timps).

Il conquist venezian dal Patriarcjât dal 1420 nol tocjà il feut asburgjic di Pordenon, che al mantignî la sô autonomie fin al 1508, cuant che Vignesie e rivà a ocupâ il piçul stât pordenonês, concedintlu in signorie ae famee dal so grant capitani di venture e culturât umanist e mecenât Bortolomiu Livian d’Alvian. Passât il curt domini dal Livian (che al cessà dal 1537 e che dut câs al rapresente un *unicum* inte storie de Rinassince furlane), Vignesie si cjapà dentri Pordenon e ‘ndi rispjetà la tradizionâl autonomie: se dut il rest dal Friûl al dipendeve dal Lûc tignint dal cjistiel di Udin, la tiere dal Nuncel e dipendeve dal provededôr-cjapitani di Pordenon. Dome inte ete napoleoniche, daûr de riorganizazion amministrative imponude dai Francês, e finî ogni separazion pordenonês. Purpûr, juste in chest moment (1806) si scomençà a sustignî il dirit di Pordenon di vê trasferide ancje sul plan amministratîf, intal Friûl occidentâl, chê funzion di riferiment pe economie e pe culture che e veve vût fin dal secul XIII.

Se il Votcent al à viodût il distac dal Puartgruarês dal Friûl, al à viodût ancje chel precoç decol industriâl (intai setôrs de ceramiche e de tiessidure) che no dome al à imponût in pôc timp la citât e la sô tiere ae atenzion di une aree simpri plui grande (intai setôrs de imprese capitalistiche, de idroeleticitât, dal sindacalisim, de cooperazion, dal dibatiment politic e vie indenant), ma al à ancje puartât a gnovis domandis di autonomie: il discors, ripiât dal 1871 dal sfuei locâl “Il Tagliamento”, sotitulât esplicitamentri “orghin dal Friûl occidentâl”, i metarà un secul par diventâ une realtât. Pordenon e varà vie vie sotprefeture e tribunâl, seminari diocesan, un CLN in pratiche provinciâl

intant de Resistance, e tornà a presentâ la sô domande cun plui decision dal 1946, dal 1963 e otignì di jessi cjâf lûc di circondari dentri de Regjon Autonome apene nassude, fin che dal 1968 e sarà in maniere definitive cjâf lûc di provincie e dal 1974 ancje sede vescovîl de diocesi “di Concuardie e Pordenon”.

La istituzion de Provincie di Pordenon e rapresente il pont plui alt de evoluzion storiche e socioeconomiche di une Aree Largje intal Friûl Occidentâl di ca dal Tiliment, la espression de prime vere leadership di un teritori che mai e jere stade buine, prime dal 1968, di realizâ in maniere complete une sô autonomie politiche amministrative e economiche.

La brame di sustignî e di confermâ la sô identitât e testimonee la capacitât di Pordenon di vê otignût, intal timp, statûts speciâi e autonomie sedi rispjet aes potencis dominantis – *enclave* e *quart franc* dal imperi dai Otons di Gjermanie e dai Asburcs di Austrie – sedi dal podê temporâl – *corpus separatum* dal Stât dai Patriarcjîs di Aquilee. E ancjemò i privileçs sot de signorie di Vignesie o pûr la istituzion, temporanie, de bande di Napoleon intant de sô prime campagne di Italie (1799), dal Distret de Gjestre dal Tiliment, posizion confermade dal 1808 cu la costituzion de Viceprefeture (Distret dal Nuncel) e dal Distret di Spilimberc.

La culture e i sburts autonomistics a tornin dopo dal 1866, an de union di Pordenon cu la Italie, e dal 1871 al ven istituît il Tribunâl cun competence su dute la Gjestre dal Tiliment. Lis desinis di agns seguitivis a marchin une une grande incesitate economiche e culturâl, ma ancje delusions, come la sopression dal Tribunâl dal 1923 –tornât in vigôr dal 1937 – e la Sotprefeture za istituide dal 1912. Dopo dal 1945, intun cul svilup dal postvuere e parie cu la idee di istituì la Regjon speciâl, si torne a sustignî i dirits di une plui largje autonomie su fonde provinciâl. Ai 21 di març dal 1949 sindics, conseîrs provinciâi di Udin, parlamentârs, sindacâts e associazions di categorie a domandin la istituzion de Provincie di Pordenon “par une plui incisive rapresentance politiche des popolazions de Gjestre dal Tiliment, une plui ecuilibrade ristrutturazion de Regjon Friûl-Vignesie Julie, miôr servizis, plui facii colegaments jenfri periferie e struturis provinciâls”.

Dal 1956 a vegnin daûr lis primis propuestis di leç e dal 1963, cu la costituzion de Regjon a Statût speciâl Friûl-Vignesie Julie, Pordenon e à il ricognossiment di Circondari e la Assemblee dai Sindics. Un compromes che al mostre la volontât di cjapâ la strade de autonomie provinciâl. Di fat, intai agns seguitîfs, a Pordenon a vegnin vierts cuasi duçj i uficis decentrâts dal Stât, a scomençâ de Viceprefeture e de Vicecuesture circondariâls.

Cu la sburtade de Assemblee dai Sindics e des fuarcis politichis, il Consei regionâl, ai 13 di mai dal 1966, al fâs buine la propueste di leç nazionâl par la costituzion de Provincie di Pordenon. Dopo de aprovazion dal Senât, intal lui dal 1967, e ven chê de Cjamare dai Deputâts dai 22 di fevrâr dal 1968.

Cu la publicazion su la Gazete Uficiâl, la leç 1 di març dal 1968 n. 171 e premie une maturitât politiche e une laboriositât socioeconomiche che a vevin marcât la tegnadice volontât des comunitâts di: Andreis – Darbe – Darzin – Davian – Daçan – Barcis – Brugnera – Budoie – Cimolais – Cjanive – Cjasarse – Cjervas – Cjiscietlgnûf – Cjons – Clausêt – Claut – Cordenons – Cordovât – Fane – Fontanefrede – Forgjarie – Frisanc – Lavorêt – Manià – Midun – Montréal – Morsan – Nert e Cas – Pasian – Pinçan – Pordenon – Prate – Pravidomini – Pulcinic – Purcie – Sacîl – Sant Martin – Sant Quarin – Sant Vît – Sant Zorç – Sequals – Sest – Tramonç di Sore – Tramonç di Sot – Travês – Valvason – Vile di Flun – Vît – Vivâr – Çopule – che a formarin, in principi, la Provincie di Pordenon, che il so Consei al tignî la sô prime sentade ai 10 di avost dal 1970.

PROVINCIE DI PORDENON

Il presint Statût al è stât publicât al Album Pretori de Provincie di Pordenon, dai 12/12/2001 ai 11/01/2002, par trente dîs seguitîfs, daûr dal art. 49 – come Iⁿ – e al è jentrât in vigôr ai 12 di zenâr dal 2002, publicât su la part 3^e dal Boletin Uficiâl de Regjon Autonome Friûl-Vignesie Julie n. 3 dai 16 di zenâr dal 2002. Integrât cun At di C.P. n. 26 dai 25/07/2002; la integrazion e je jentrade in vigôr il 1ⁿ di setembar dal 2002 e publicade su la part 3^e dal Boletin Uficiâl de Regjon Autonome Friûl-Vignesie Julie n. 38 dai 18/09/2002.

STATÛT

SUMARI

TITUL I

PRINCIPIS E DISPOSIZIONS PROGRAMATICHIS

Art. 1

Finalitâts dal Statût

Art. 2

Provincie di Pordenon

Art. 3

Principis programatics

Art. 4

Funzions de provincie

Art. 5

Formis associativis e di colaborazion

Art. 6

Circoscrizions

Art. 7

Funzions di aree largje

Art. 8

Principis de azion aministrative

Art. 9

Principis gjenerâi in cont dal funzionament dai uficis e dai servizis

Art. 10

La sede, la steme e il confanon

TITUL II
I ISTITÛTS DI PARTICIPAZION

Art. 11

Procediment e situazions sogjetivis dai privâts

Art. 12

Aces ai ats e ai documents

Art. 13

Participazion e instancis popolârs

Art. 14

Regjistri provinciâl des associazions

Art. 15

Consultis e osservatoris provinciâi

Art. 16

Interogazions, propuestis e petizions popolârs

Art. 17

Propuestis deliberativis di iniziative populâr

Art. 18

Referendum

TITUL III
I ORGHINS DE PROVINCIE

Art. 19

Orghins istituzionâi

Art. 20

Aministradôrs provinciâi

Art. 21

Consei provinciâl

Art. 22

President dal Consei

Art. 23

Conseîrs provinciâi

Art. 24

President de Provincie

Art. 25

Zonte provinciâl

Art. 26

Leament jenfri Zonte e Consei

Art. 27

Funzions dal Segretari Gjenerâl

Art. 28

Vicesegretari provinciâl

Art. 29

Assunzion dai Dirigjents

Art. 30

Competencis dai Dirigjents

Art. 31

Conference dai Dirigjents

Art. 32

Utilizazion dal personâl a timp determinât

Art. 33

Incjariis di direzion

Art. 34

Durade des incjariis di direzion

Art. 35

Diretôr Gjenerâl

Art. 36

Proceduris di apalt e di concors

TITUL IV

*DISSIPLINE DES FUNZIONI PROVINCIALS E DAI
SERVIZIS*

Art. 37

Normis in cont dal compiment des funzions

Art. 38

Modalitâts di gjestion

Art. 39

Colaborazion cu lis Comunitâts Montanis

Art. 40

Colaborazions jenfri Provincie e Comuns

Art. 41

Colaborazion cui Comuns par areis funzionâls

Art. 42

Formis di cooperazion

TITUL V

LA FINANCE E I CONTROI CONTABII

Art. 43

Programazion finanziarie

Art. 44

Belanç anuâl e plurienâl

Art. 45

Control di gjection, la valutazion e il control strategjic

Art. 46

Colegjo dai Revisôrs

Art. 47

Leament jenfri Consei e Colegjo dai Revisôrs

TITUL VI

NORMIS FINÂLS E TRANSITORIIS

Art. 48

Modifichis al Statût

Art. 49

Jentrade in vigôr dal Statût

TITUL I

PRINCIPIS E DISPOSIZIONS PROGRAMATICHS

Art. 1
Finalitâts dal Statût

- 1) In armonie cu la Costituzione e cul Statût speciâl di autonomie de Regjon Friûl-Vignesie Julie, il Statût presint al fisse i principis dal ordenament de Provincie di Pordenon, cun chê di realizâ un efficient sisteme amministratîf di autonomie.
- 2) La Provincie, ancje in atuazion de Cjarte Europeane des Autonomiis Locâls, fate buine cu la leç 30 di dicembar dal 1989, n. 439, e garantis la partecipazion dai ents locâi al davuelzisi des sôs funzions e dai compits amministratîfs.
- 3) La Provincie e prepare i imprescj che a coventin par sigurâ la plene cognossince di dutis lis normis e i regolaments in vigôr intai diviers setôrs di competence provinciâl su la fonde des leçs dal Stât, de Regjon e dai statûts e regolaments dai ents locâi.

Art. 2
Provincie di Pordenon

- 1) La Provincie di Pordenon, ent locâl mezan di guvier jenfri comuns e Regjon Friûl-Vignesie Julie, e rapresente la comunitât di feminis e oms che a vivin intal so teritori, e sta daûr ai lôr interès, indi sostente e coordene il svilup, indi tutele lis particolaritâts culturâls, storichis, linguistichis, sociâls e economichis in osservance dai principis de Costituzione e dal Statût speciâl de Regjon Friûl-Vignesie Julie, in armonie cu lis leçs statâls e regionâls, su la fonde dai principis e des modalitâts stabilîts dal presint statût e dai regolaments fats di pueste.
- 2) Il teritori de Provincie al met adun ducj i teritoris dai comuns che le componin.
- 3) La Provincie e a par cjaf lûc la citât di Pordenon.

Art. 3

Principis programatics

1) La Provincie e valorize la sô posizion gjeografiche, intai limits de partignince ae Regjon Autonome Friûl-Vignesie Julie, par judâ la colaborazion tra la comunitât provinciâl e lis comunitâts, lis istituzions, i Stâts cun particolâr riferiment a chei che a fasin part de aree gjeografiche de Europe Centri Orientâl e Balcaniche. Dentre cheste suaze la Provincie e valorize la plui largje e zovevul colaborazion cu lis popolazions dal vicin Venet e i ents locâi che lis rapresentin.

2) La Provincie e valorize lis liberis formis di associazion e di cooperazion dai citadins, cun particolâr atenzion a chês dal volontariât e e svilupe mûts di cooperazion cu lis formis di organizazion sociâl publichis e privadis locâls, nazionâls e internazionâls, intai setôrs economics, sociâi, culturâi.

3) La Provincie e valorize il patrimoni culturâl de comunitât in dutis lis sôs formis, e sosten la produzion di expressions culturâls, e jude lis iniziativa fondadis su la tradizion storiche locâl, e promôf, intal rispjet des rispjetivis autonomiis, la plui largje colaborazion cu l'universitât e lis altris scuelis di formazion superiôr e 'ndi sigure il sostegn des ativitâts.

4) La Provincie e ricognos e e jude il principi de libertât di siele educative, e valorize la autonomie funzionâl des istituzions scolastichis e e colabore ae programazion didatiche e ae ufierte formative par promovî il leament e la sintesi jenfri lis esigjencis e lis potenzialitâts individuâls dai zovins e i obietîfs dal sisteme di istruzion.

5) La Provincie e ricognos l'ambient naturâl e storic sicu caratar inalienabil e indispensabil de identitât des comunitâts locâls dal territori provinciâl, indi tutele la integritât e 'ndi valorize lis potenzialitâts par lis gjenerazions presintis e futuris. L'ambient naturâl, la flore, la faune, il patrimoni archeologic, storic, monumentâl, artistic e culturâl, a son lis condizions e i limits di un svilup plui ecuibrât e siôr dai sengui e de comunitât.

6) La Provincie e realize la sô funzion centrâl di colaborazion dentri de programazion sanitarie e socio-assistenzial e cun di plui inte verifiche dai risultâts otignûts, metint dongje un osservatori provinciâl cun compits di

control, studi, ricerche, analisi e proposte cun chê di coordinâ i interventi.

7) La Provincie e jude il sisteme produtîf locâl, e valorize la rêta di servizis e infrastruturis, e promôf iniziativa che a tirin a svilupâ il sisteme di impresis tecnologicamentri avanzadis e cun di plui societâts e istitûts sientifics e di alte tecnologie ance nazionâi e internazionâi.

8) La Provincie e promôf oportunitâts compaignis inte comunitât provinciâl, cun atenzion particolâr ae condizion feminine. A chest riuart e realize condizions di oportunitâts compaignis jenfri om e femine intal compî lis sôs funzions istituzionâls e inte gjestion dai servizis publics. E ricognos la funzion sociâl dai anzians, indi valorize la esperience, indi tutele i dirits e i interès, e tutele i dirits dai fruts, dai frutats e dai zovins.

9) La Provincie e concôr ae tutele dal dirit di sigurece des personis in colaborazion cu lis istituzions sorestantis al ordin public.

10) La Provincie e jude il mantigniment dai leams culturâi, morâi e economics cui siei citadins che a son a stâ intal forest.

11) La Provincie e indete la sô azion ai principis di bon acet in confront aes personis che a rivin di altris areis gjeografichis par dâ une man ae inessite de provincie intal rispjet des leçs e des tradizions. In particolâr e vûl rivâ a vê obietîfs di svilup armonic integrât e difundût di dute la comunitât provinciâl, a travers de partecipazion ai proces di planificazion teritoriâl e a travers dal intervent in colaborazion cui comuns e su la fonde di programs proponûts de Provincie par ristrutturâ, fâ inressi e rinfuarcî i sistemis insediatîf, produtîf, infrastruturâl e di servizis cun atenzion specifiche aes particolaritâts e aes vocazions di ogni sengule bande dal teritori provinciâl.

Art. 4

Funzions de provincie

1) La Provincie e fâs su la fonde des leçs statâls, regionâls e lis normis dal statût presint lis funzions sôs e chês che i vegnin conferidis dal Stât e de Region, e e realize il principi de sussidiaritàt.

2) La Provincie e fâs dutis chês funzions aministrativis relativis ae cure dai interès gjenerâi che no son stadis destinadis claramentri a altris ents.

3) La Provincie e fâs in particolâr funzions di programazion dal svilup economic e sociâl coordinant, ancje midiant di acuardis di programe, lis ativitâts dai ents teritoriâi e des lôr associazions e promovint chês dai ents funzionâi che ancjemò a son in vore inte aree di competence, con atenzion speciâl ae particularitât di chês aree stesse e ai interès che si riferissin a jê.

4) La Provincie e fâs la ativitât tributarie e e cjape sù i ats normatîfs relatîfs su la fonde dai principis stabilîts de Leç 212/2000 e des normis regionâls.

Art. 5

Formis associativis e di colaborazion

1) La Provincie e met jù i indreçaments gjenerâi di asset dal teritori intal rispjet des competencis e des funzions di chei altris ents teritoriâi.

2) Cuant che lis dimensions teritoriâls e la nature des ativitâts lu domandin la Provincie e pues:

a) dâi la deleghe o trasferì ancje a timp determinât ai Comuns sengui o associâts funzions propriis;

b) promovi la iniziative parcé che a si metin adun o a fasin convenzions.

3) Par compî miôr lis funzions technichis e aministrativis plui ingredeadis o che, par vie che no àn une organizazion proporzionade, al covente un sparagn inte azion aministrative, la Provincie e promôf associazions jenfri i Comuns intai mûts stabilîts de Leç, ancje a travièrs de costituzion di uficis comuns par tratâ afârs istituzionâi, finanziariis, contabii, lavôrs publics, e chei che a rivuardin il control di gjestion, la formazion dal personâl, lis fasis di progjetazion dai interventi che a puedin cjapâ bêçs de Union Europeane.

Art. 6

Circoscrizions

1) La Provincie e pues meti sù circoscrizions di decentrament aministratîf assegnantjur funziions esecutivis e di partecipazion, e cun di plui l'esercizi dai servizis di base cun autonomie e responsabilitât di gjestion su la fonde des diretivis de aministrazion provinciâl.

2) Ogni circoscrizion ancje in atuazion dal art. 5 e je creade cun mutivade delibare consiliâr che e fisse i compits, lis funziions e lis modalitâts organizativis e la compatibilitât economiche.

Art. 7

Funziions di aree largje

1) La Provincie e colabore, daûr des formis previodudis de Leç, cu lis iniziativis istituzionâls che a smirin a definî un spazi sorecomunâl pordenonês par l'esercizi coordinât di bande dai comuns des ativitâts e des politichis di aree largje sicu:

a) planificazion teritoriâl;

b) rêts infrastrutturâls e servizis a rêt;

c) plans di trafic intercomunâi;

d) tutele e valorizazion dal ambient e rilevament dal incuinament atmosferic;

e) interventis di difese dal teren e di tutele idrogeologjiche;

f) racuelte, distribuzion e depurazion des aghis;

g) smaltiment refudums;

h) grant distribuzion comerciâl;

i) ativitâts culturâls;

j) ativitâts sociâls e socio-sanitariis;

k) funziions dai Sindics in materie di oraris.

Art. 8

Principis de azion aministrative

1) La Provincie e cjape sù la programazion gjenerâl e daûr progjets sicu metodi di guvier e si adate al principi che i podês di indreçament e di control i spietin ai orghins politics e invezit il maneç i tocje ai dirigjents.

2) La Provincie si impegne a promovi e valorizâ la partecipazion popolâr, des associazions e des organizacions.

3) La Provincie e vûl une aministrazion trasparint e e garantis l'aces ai siei ats e providiments a ducj chei che 'ndi àn interès, daûr des formis che a son ricognussudis e dissiplinadis cun regolament. In ogni mût la Provincie e previôt une publicitât adate pai siei ats, cussì che e sedi sigurade la informazion plui largje.

Art. 9

Principis gjenerâi in cont dal funzionament dai uficis e dai servizis

1) La Provincie e indete il compiment des sôs funzions a principis di economicitât, di capacitât e di eficacitât. E sigure la publicitât e la trasparence dai siei ufis e servizis.

2) La Zonte provinciâl e met dongje il regolament in cont dal ordenament dai uficis e dai servizis, intal rispiet des normis gjenerâls che a regolin la materie di chescj principis gjenerâi

a) la ativitât di ducj i uficis e servizis provinciâi e je prontade par judâ i citadins a sodisfâ pardabon lis lôr dibisugnis, garantint la massime trasparence aministrative;

b) i podês di indreçament e di control i spietin ai orghins eletîfs dal ent e invezit ai Dirigjents i tocje il maneç finanziari, tecnic e aministratîf, cjapant dentri ducj i ats che a impegnin le aministrazion cu l'esterni;

c) la ativitât aministrative dal ent e je indetade ai principis de programazion gjenerâl e daûr progjets e si realize a traviers la determinazion des responsabilitâts e cu la colaborazion di dut il personâl;

d) la articolazion dai uficis e je stabilide su la fonde di criteris di omogjenitât funzionâl;

e) la assegnazion des competencis ai uficis e ai servizis provinciâi, parie cu la definizion dai dovês dal personâl, a son indetadis a criteris di largje flessibilitât di organizazion;

f) la incesite dal rindiment e la razionalizazion des ativitâts e dai procediments aministratîfs a son otignûts judant l'ûs dai imprescj informatics;

g) la stime di mert dal lavôr davuelt dai Dirigjents cun rivuart ae realizazion dai obietîfs e ae cualitât des prestazions.

Art. 10

La sede, la steme e il confanon

1) La sede de Provincie e je logade intal comun cjâf lûc.

2) La steme e je constituide di un scût di colôr blanc, cun orladure di aur cjamât de imagjin de Diesse Concuardie vistude che e ten inte man drete un ramaçut di ulîf al naturâl e inte çampe une cornucopie di aur plene di pomis ancjemò al naturâl; sot de ponte dal scût, suntune striche di celest, cu lis pontis glovadis, la scrite in caratars romans grancj di neri "CONCORDIA PARVAE RES CRESCUNT". Ornaments par di fûr di Provincie.

3) Il confanon, di forme regolamentâr, al riprodûs la steme de Provincie cun drap dividût, di celest e di zal, ornât in maniere siore cun ricams di aur cu la iscrizion centrade in aur "Provincia di Pordenone".

4) L'ûs de steme e dal confanon, concedûts cun decret dal President de Repubbliche 30 di avrîl dal 1976, al è stabilît dal regolament.

TITUL II

I ISTITÛTS DI PARTICIPAZION

Art. 11

Procediment e situazions sogjetivis dai privâts

- 1) L'ufici che al procêt al à di comunicâ ai interessâts l'inizi dai procediments che adotin ats che a incidin su situazions sogjetivis.
- 2) Cuant che l'at al rivuarde une persone sengule o ben plui personis che a son titulârs di un stes drit, e à di jessi comunicade a dutis la vierzidure dal procediment. Par che il procediment al sedi plui svelt, in câs di proprietâts stabilis, si pues proviodi a cjatâ i destinatariis de comunicazion ancje a traviars des risultis catastâls.
- 3) Cuant che l'at al rivuarde un numar indefinît di personis, si dà la comunicazion midiant de afission intal album pretori e la stampe.
- 4) I interessâts a àn il drit di jessi sintûts in cualsisei moment e di vê lis informazions su cemût che al va indenant il procediment; a puedin presentâ deduzions e cuintrideduzions par scrit.

Art. 12

Aces ai ats e ai documents

- 1) La Provincie e ricognos che la informazion ai citadins e je la condizion par sigurândi la efetive partecipazion ae vite sociâl e politiche.
- 2) Ducj i ats e i documents de Provincie a son publics, cun chê di sigurândi la trasparençe de ativitât aministrative e il so imparziâl davuelziment.
- 3) Il drit di ducj chei che a àn interès a vê aces ai ats e ai documents de Aministrazion al è disciplinât dal regolament cun riferiment al art. 10 dal T. U. 267/2000 e de Leç 241/1990.
- 4) I provediments dai orghins de Provincie a deventin publics midiant de afission di copie al album pretori.

Art. 13

Partecipazion e instancis popolârs

- 1) Ducj i citadins, ancje chei de Union Europeane e i forestîrs che a stan culî in regule, a àn dîrit a partecipâ ae aministrazion, di bessôi o metûts adun, a traviers de presentazion di instancis, petizions e propuestis che a domandin di promovî intervents par tutelâ miôr i interès coletîfs di competence de Aministrazion.
- 2) La Provincie, metint in pratiche i obietîfs dal art. 3 dal Statût presint, e realize la plui largje partecipazion ae sô ativitât des associazions e des organizacions di volontariât.
- 3) Associazions e organizacions di volontariât, notadis intal registri provinciâl, a puedin fâ rivâ osservazions e propuestis in cont des materiis che a toçjin e a rivuardin diretamentri la lôr ativitât.
- 4) Lis sorenomenadis osservazions, propuestis e instancis a son depositadis là dal Uffici dal Segretari Gjenerâl dal ent; a varan une rieste dentri cuarantecinc dîs dal depuesit.

Art. 14

Registri provinciâl des associazions

- 1) La Provincie e proviot ae istituzion dal registri des associazions e des organizacions di volontariât impegnadis in ativitâts sociâls, culturâls e ambientâls e indi dissipline la tignude.
- 2) A puedin notâsi lis associazions e lis organizacions che a davuelzin ativitâts di valôr sorecomunâl e chês che a àn structuris provinciâls o subprovinciâls.
- 3) La Provincie e promôf la consultazion des associazions notadis intal registri provinciâl cuant che e riten che al covente pai ats fundamentâi di competence consiliâr. Si avâl de lôr vore e di chê dai lôr socis cuant che al è compatibil cu lis sôs funzions.
- 4) Inte ipotesî ca parsore, la Provincie e pues meti a disposizion di associazions e organizacions di volontariât, structuris, bens e servizis provinciâi.

5) La Provincie e pues dâ il so patrocini aes iniziativas des associazions e des organizacions di volontariât notadis participant, se al covente, al lôr finanziament.

Art. 15

Consultis e osservatoris provinciâi

1) Par judâ formis organichis e seguitivis di partecipazion popolâr, la Provincie e pues meti sù une o plui consultis e un o plui osservatoris, fissant cul regolament istitutîf i interès che a àn di jessi rapresentâts e lis associazions e organizacions che a àn di mandâi i rapresentants.

2) Lis consultis e i osservatoris a son organisims ausiliaris de Provincie cun funzions consultivis e propositivis.

3) Il regolament al fisse il numar e i ambits des competencis des consultis di setôr, la lôr organizazion interne, lis modalitâts e i timps di convocazion des riunions.

Art. 16

Interogazions, propuestis e petizions populârs

1) I Comuns e cussì i citadins sengui o associâts a puedin presentâ al President de Provincie petizions, interogazions e propuestis, su materiis, programs e ats che a tocjin interès gjenerâi, servizis e structuris che a rivuardin dut il teritori provinciâl.

2) Par rapresentâ interès de coletivitât provinciâl o di une sô part o ben par stomblâ intervents de Aministrazion, cincent o plui citadins a puedin presentâ al President de Provincie une petizion apueste.

3) Tignût cont che la petizion e rivuarde materie di competence provinciâl, il President al confide al Assessôr competent la incjarie di davuelzi une istrutorie apueste e di riferîndi ae Zonte par concuardâ il provediment di presentâ al Consei, se al è di sô competence, a traviere dal so President, o ben di deliberâ diretamentri in mert. Dut câs la procedure e à di sierâsi cuntune delibare dentri sessante dîs dal so depuesit.

Art. 17

Propuestis deliberativis di iniziative popolâr

- 1) Mil o plui citadins a puedin presentâ propuestis articuladis in forme di delibare par chel che al è di competence istituzionâl de Provincie.
- 2) Il President, stabilide la competence de Provincie su chê propueste e che la formulazion e je adate, e cun di plui che i imprescj financiaris previodûts a corispuindin, al incarghe l'Assessôr competent di davuelzi la istrutorie che e covente. Al so completament, al proviôt ae iscrizion al ordin dal dì de Zonte o ben le mande al President dal Consei se al è competent.

Art. 18

Referendum

- 1) La Provincie e proviôt, sicu imprest di partecipazion dai citadins, il referendum in cont des materiis di competence istituzionâl gjavant fûr i providiments che a rivuardin tribûts e tarifis e i providiments cuntun contignût leât stabilît di leçs statâi o regionâls.
- 2) Ancje il Consei Provinciâl al pues promuovi il referendum cul vôt dai doi tierçs dai siei components; o ben di almancul 10 Conseis Comunâi che a rapresentin almancul il 15% de popolazion provinciâl; o ben di 10.000 citadins notâts intes listis elettorâls de circoscrizion provinciâl.
- 3) Un regolament al dissipline lis modalitâts di indizion e di davuelziment dal referendum e in particolâr la presentazion de domande e la racuelte des firmis dai eletôrs.

TITUL III

I ORGHINS DE PROVINCIE

Art. 19

Orghins istituzionâi

- 1) A son orghins di guvier, il Consei, la Zonte e il President de Provincie.
- 2) Cun rivuart aes atribuzions conferidis de Leç e dal statût presint al è Conseîr anzian il Conseîr che intes ultimis votazions provinciâls al à cjàpât la plui grant cifre individuâl, cence contâ il President neoelezût e i candidâts ae incjarie di President proclamâts conseîrs. La cifre individuâl al è il rapuart percentuâl jenfri i vôts otignûts di ognidun dai candidâts e il totâl dai vôts valits dal colegjo. La anzianitât e ven dopo da lis cifris individuâls; in câs di paritât al devente Conseîr anzian chel plui vieli.

Art. 20

Aministradôrs provinciâi

- 1) I amistradôrs provinciâi intant che a fasin lis lôr funzions a prontin il so puartament a imparzialitât e al principi di buine aministrazion, rispîtant la separazion des funzions di indreçament e di control, propriis dai orghins di guvier e di chês di maneç, propriis dai dirigjents.
- 2) I ats che si riferissin ae situazion patrimoniâl, ai redits e aes spesis eletorâls dai amistradôrs provinciâi, che a son publics daûr des disposizions de leç, a son depositâts là dal Uffici di segreterie dal Consei Provinciâl e ducj a puedin liberamentri viodiju.
- 3) I amistradôrs provinciâi no puedin cjàpâ part, cul slontanâsi de aule, ae discussion e ae votazion di delibaris che a interessin lôr o familiârs e parincj fintremai al cuart grât. Il dovê di astension no si lu apliche cuant che la discussion e la votazion a rivuardin provediments normatîfs o di caratar gjenerâl, fale i câs che e sedi une relazion imediade e direte jenfri il contignût de delibare e specifics interès dal amistradôr o di familiârs e parincj fintremai al cuart grât.
- 4) La Provincie e sigure cuintri i risis relatîfs al compliment dal lôr mandât il President de Provincie, il President dal Consei, i Assessôrs e i Conseîr provinciâi.

Art. 21

Consei provinciâl

- 1) Il Consei provinciâl, orghin di indreçament e control politico-amministratîf de Provincie, al compîs lis funzions che i son conferidis de leç e dal Statût presint.
- 2) Il Consei provinciâl al concôr ae definizion, al adatement e ae verifiche de atuazion des liniis programatichis. Ducj i Conseîrs provinciâi a àn dirit di intervignî inte definizion des liniis programatichis cul proponi modificchis e integrazions a traviers di emendaments. Il Consei, parie cu la discussion sore il document di programazion finanziarie e ae discussion sore il rindicont, al verifiche la atuazion des liniis programatichis.
- 3) Denti trente dîs dal logament, il Consei gjenerâl al fâs bogns i indreçaments pe nomine e la designazion dai rapresentants de Provincie là di ents, aziendis, istituzions e altris organisims che a manezin servizis publics e proviôt ae relative nomine intai câs previodûts de leç. Cuant che il Consei nol proviodi denti il soreddit tiermin si intindin confermâts i indreçaments che a jerin. La nomine e la designazion dai rapresentants de Provincie no puedin durâ plui dal mandât eletîf dal President de Provincie, fatis salvîs lis disposizions dai statûts dai ents di riferiment.
- 4) Il Consei provinciâl, denti dai principis stabilîts de leç, al gjolt di autonomie funzionâl e organizzative e al dispon, daûr des modalitâts previodudis dal regolament dal Consei, di specifics fonts di bilanç, di personâl adat, di locâls e di imprescj adats pal funzionament des sôs struturis, dai grops e des Comissions consiliârs.
- 5) I lavôrs e lis ativitâts dal Consei provinciâl a son dissiplinadis cuntun regolament fat bon dal Consei cul vôt favorevul de maiorance assolude dai Conseîrs.
- 6) Il regolament conseâr al dissipline il funzionament dal Consei e in particolâr lis modalitâts di convocazion e di presentazion e discussion des propuestis. Cun di plui il regolament al fisse il numar dai Conseîr che a coventin pe validitât des sentadis, previodint dut câs che a sedin presints almancul un tierç dai Conseîrs assegnâts par leç al ent, cence contâ par chest fin il President de Provincie.

7) Il regolament consiliâr al dissipline la costituzion dai Grops Consiliârs. E je consentide la formazion di un Grop Miscliç.

8) La Aministrazion provinciâl e sigure ai grops i locâi e i servizis che i coventin pal compliment dai dirits dai Conseîrs. A ducj i grops i ven assegnât un font di dotazion e la entitât e la modalitât di ûs a son stabilidis dal regolament consiliâr. Il Segretari Gjenerâl al sorestà ai relatîfs adempiments.

9) Par organizâ i lavôrs dal Consei provinciâl e salfs i câs di urgjence, il President dal Consei al clame dongje e al consulte la Conference dai Cjâfs grop consiliârs.

10) La Conference dai Cjâfs grop e je costituide dai esponents nomenâts di ogni grop e a cjâf al è il President dal Consei.

11) Il regolament dal Consei al fisse il numar, lis competencis e il funzionament des Comissions consiliârs permanents cun funzions istrutoriis, referents e di control, e cun di plui lis modalitâts par istituî comissions consiliârs speciâls. La composizion des Comissions consiliârs e à di lâ daûr de proporzion dai Grops consiliârs. La presidence des Comissions consiliârs che a àn funzions di control o di garanzie i ven atribuide aes oposizions daûr dai criteris stabilîts dai regolament.

Art. 22

President dal Consei

1) Inte prime sentade, a pene che al à convalidât i elets, il Consei al procêt ae elezion dal President dal Consei.

2) Al President dal Consei i son atribuîts i podês previodûts de leç e in particolâr chei di rapresentance dal Consei, di programazion, convocazion e direzion dai lavôrs e des ativitâts.

3) Il regolament al fisse lis modalitâts di compliment dai podês dal President dal Consei.

4) Se il President dal Consei nol è lis sôs funzions a son compidis dal Conseîr anzian.

Art. 23
Conseîrs provinciâi

- 1) I Conseîrs a rapresentin la comunitât provinciâl e a compin lis sôs funzions cence vincûl di mandât.
- 2) I Conseîrs a àn dirit di iniziative pai ats di competence consiliâr.
- 3) I Conseîrs a puedin presentâ emendaments aes propuestis di deliberazion e cun di plui interrogazions scritis, interpelancis, mozions e ordins dal dì, daûr des modalitâts fissadis dal regolament consiliâr.
- 4) I Conseîrs a àn dirit di domandâ e di otignî dai Dirigjents dai uficis de Provincie e des aziendis e dai ents dipendents dutis lis gnovis e lis informazions che a coventin pal compliment dal lôr mandât.
- 5) Intai câs determinâts in maniere specifiche de leç i Conseîrs a scugin mantignî il segret in cont des informazions vudis dai uficis.
- 6) Il Conseîr che al mancje cence vêsi justificât par scrit par dôs voltis seguitivis des sentadis dal Consei al discjât de incjarie. Par chest efiet il President dal Consei al invade il Conseîr a presentâ lis justificazions dentri dal tiermin di 20 dîs di cuant che al à vût la domande. I ats relatîfs, daûr de valutazion de Conference dai Cjâfs grop, che e varà di domandâ sclariments o elements integratîfs, a saran mandâts al Consei par une definitive decision o ben par fâ buinis lis justificazions o par declarâ la discjadince de incjarie.
- 7)¹ Ogni Conseîr al pues, su domande, otignî la trasformazion dal gjeton di presince intune indenitât di funzion, tal rispjet de disposizion dal articul 82 dal Decret Legjislatîf 18.04.2000, n. 267. Il regolament dal Consei al determinarà lis modalitâts pe cuantificazion e atribuzion de indenitât di funzion.

Art. 24
President de Provincie

- 1) Il President al è l'orghin responsabil de Aministrazion de Provincie e al rapresente l'ent ancje in judizi.

¹ Integrazion fate buine cun at di C. P. n. 26 dal 25.07.2002.

2) Denti il tiermin di 60 dîs de prime sentade il President de Provincie, dopo di vê sintût la Zonte, al presente al Consei lis propuestis di liniis programatichis relativis aes azions e ai progjets di realizâ intant dal mandât. Fat il dibatiment, intai 20 dîs seguitîfs il President, dopo di vê sintût la Zonte, al presente al Consei pe aprovazion il programe definitîf di mandât.

3) In ocasion de aprovazion dal bilanç anuâl, de verifiche dal stât di atuazion dai programs e dai progjets daûr dal art. 193 dal T.U. 267/2000 e de aprovazion dal cont consuntîf dal an, si puedin presentâ al vôt dal Consei propuestis di integrazion e modifiche dal program di mandât.

4) Il President de Provincie al pues confidâ a Conseîrs provinciâi incjariis a timp determinât, fissantint funzions e tiermins, fûr che ativitâts di caratar aministratîf e gjestionâl.

Art. 25

Zonte provinciâl

1) La Zonte provinciâl e je componude dal President de Provincie, che indi è a cjâf, e e di un numar di Assessôrs no mancul di cuatri e no plui di vot.

2) La Zonte provinciâl e colabore cul President par atuâ i indreçaments gjenerâi dal Consei e de Aministrazion de Provincie e al in spire la sô ativitât ai principis di colegjalitât, trasparençe e eficacitât. Al compis i ats che daûr de leç no i spietin al Consei e che no sedin di competence, previodudis des leçs o dal Statût, dal President de Provincie, dal Segretari o dai Dirigjents. La Zonte e à competence su la adozion dai regolaments sore l'ordenament dai officis e dai servizis, daûr dai criteris gjenerâi stabilîts dal Consei.

3) La Zonte provinciâl e dà ai Dirigjents lis diretivis che a coventin pal compiment dai compis che ur spietin, in aplicazion dai ats di indreçament mandât fûr dal Consei. Intal compiment di chês funzions, l'Assessôr al lee la ativitât de Zonte cun chê dal maneç aministratîf e al à tant che referent il Dirigjent responsabil dal setôr.

4) Salf i câs che a previordin in maniere diverse, lis deliberazions de Zonte provinciâl a àn valôr se e je presint la maiorance dai membrs in incjarie e se son fatis buinis de maiorance di chei che a votin.

5) I membrs de Zonte che no son Conseîrs a àn dirit di assisti aes sentadis dal Consei intai bancs di pueste riservâts ae Zonte. Se a son interrogâts o interpelâts a scugin rispindi. No àn il dirit di vôt, no puedin jessi a cjâf dal Consei e no si contin par validâ la sentade.

Art. 26

Leament jenfri Zonte e Consei

1) Il regolament dal Consei al stabilis la ativitât di competence dal President dal Consei par rindi concret il leament jenfri Zonte e Consei.

Art. 27

Funzions dal Segretari Gjenerâl

1) Il Segretari Gjenerâl al dipent funzionalmentri dal President de Provincie. Al davuelç compits di colaborazion e funzions di assistence juridic-aministrative pai orghins dal ent in ordin ae conformitât de azion aministrative cu lis leçs, cul statût e cui regolaments, intal rispjet des diretivis dal President e dai ats di indreçament de Zonte.

2) Il Segretari al sorestà ancje al davuelziment des funzions dai Dirigjents e indi coordene la ativitât cuant che al mangje il Diretô Gjenerâl nomenât dal President de Zonte daûr dal seguitîf articul 35.

3) Cun di plui il Segretari:

a) al partecipe cun funzions consultivis, referentis e di assistence aes sentadis dal Consei e de Zonte e indi cure la verbalizazion;

b) al pues rogâ ducj i contrats che a rivuardin l'ent e autenticâ scrituris privadis e ats unilaterâi par interès dal ent;

c) al compis dutis chês altris funzions che il Statût o i regolaments i dan o che i son conferidis dal President de Provincie.

Art. 28

Vicesegretari provinciâl

- 1) La Provincie e à un Vicesegretari provinciâl nomenât dal President e sielzût fra i Dirigjents che a àn i requisîts de leç e di regolament. La incjarie e à une durade predeterminade e no si rinove cence dî nuie.
- 2) Il Vicesegretari al jude il Segretari Gjenerâl e al cjape il so puest se al mançe, se al è assent o se al è intrigât.
- 3) Il Dirigjent che al à funzions di Vicesegretari al manten la direzion di un setôr de Aministrazion.

Art. 29

Assunzion dai Dirigjents

- 1) La assunzion di personâl cun cualifiche di dirigjent si pues fâle dome a traviers di assunzion di personâl cun contrat a timp determinât daûr dai criteris fissâts dal regolament sore l'ordenament dai uficis e dai servizis, lassant fûri rapuart di timp parziâl.

Art. 30

Competencis dai Dirigjents

- 1) I Dirigjents a àn il compit di organizâ e dirizi la ativitât dai uficis e dai servizis che indi dipendin, daûr dai criteris e des normis detadis dal presint Statût e dai regolaments. Ur e je atribuïde la gjestion amministrative par l'atuazion dai obietîfs, dai programs e dai projets determinâts dai orghins politics.
- 2) Il Dirigjent al è responsabil de organizazion interne e de distribuzion dal lavôr jenfri i uficis e i servizis là che al è sorestant, daûr des normis stabilidis dal regolament di organizazion.
- 3) Il Dirigjent al è responsabil, daûr des leçs in vigôr, de regolaritât tecniche e contabil des deliberazions, dai ats e in gjenerâl de azion amministrative dal ent par cuant che al è di competence. In particolâr, i son atribuïts i compits di atuazion dai obietîfs e dai programs definîts cui ats

di indreçament adotâts dai orghins di guvier e in particolâr, daûr des modalitâts fissadis dal presint statût o dai regolaments dal ent:

- a) la presidence des comissions di gare e di concors;
- b) la responsabilitât des proceduris di apalt e di concors;
- c) la stipule dai contrats;
- d) i ats di maneç finanziari, comprendude la assunzion di impegnis di spese;
- e) i ats di aministrazion e di gjestion dal personâl;
- f) i providiments di autorizazion, concession o parêi, che par vêju bisogne fâ accertaments e valutazions, ancje di nature discrezionâl, daûr dai criteris predeterminâts de leç, dai regolaments, di ats gjenerâi di indreçament, comprendudis lis autorizazions;
- g) lis atestazions, lis certificazions, lis comunicazions, difidis, verbâi, autenticazions, legalizazions e ducj chei ats che a costituissin manifestazion di judizi e di cognossince;
- h) i ats che ur son atribuîts dal statût e dai regolaments o ben, su la fonde di chescj, delegâts dal President.

4) Il regolament sore l'ordenament dai uficis e dai servizis al stabilis lis modalitâts e i criteris par la sostituzion dal dirigjent titulâr che al mancje o che al è pal moment intrigât.

Art. 31

Conference dai Dirigjents

1) E je istituide la Conference dai Dirigjents componude dal Segretari Gjenerâl, che indi è il president, e dai Dirigjents. E je clamade dongje dal Segretari, par sô iniziative o su disposizion dal President de Provincie.

2) La Conference dai Dirigjents e davuelç ativitâts di programazion, leament e coordinament de ativitât di gjestion amministrative di competence di ducj i setôrs dal ent, daûr di cuant che al è previodût dal regolament sore l'ordenament dai uficis e dai servizis.

3) Se al vès di jessi nomenât il Diretôr Gjenerâl, chest al cjape sù lis funksions previodudis dal come 1 pal Segretari Gjenerâl.

Art. 32

Utilizazion dal personâl a timp determinât

1) Par esigjencis temporaniis o ben par chês previoududis dal art. 90 dal T.U. 267/2000, la Provincie e pues constituî rapuarts di lavôr a timp parziâl e a timp determinât, plen o parziâl, daûr des dissiplinis in vigôr in materie e dal regolament di organizazion.

Art. 33

Incjariis di direzion

1) Lis incjariis di funzion di dirigjent a son a timp determinât e a son conferidis dal President cuntun provediment motivât, daûr des modalitâts fissadis dal regolament sore l'ordenament dai uficis e dai servizis, daûr criteris di competence professionâl, in relacion ai obietîfs stabilîts intal program aministratîf dal President; il stès al pues revocâju in câs di inosservance des diretivis dal President, de Zonte o dal Assessôr di riferiment, o in câs che si sedi rivât ai obietîfs fissâts cul plan esecutîf di gjestion o par responsabilitât une vore grave o continuade o intai altris câs duissiplinâts dai contrats coletîfs di lavôr.

Art. 34

Durade des incjariis di direzion

1) Lis incjariis daûr dal art. 33 dal Statût presint no puedin durâ plui dal mandât dal President de Provincie.

Art. 35

Diretôr Gjenerâl

1) Il President al pues nomenâ, daûr dai criteris fissâts dal regolament sore l'ordenament dai uficis e dai servizis un Diretôr Gjenerâl, fûr de dotazion organiche e cun contrat a timp determinât, daûr dai criteris che a saran stabilîts ta chel regolament.

Art. 36

Proceduris di apalt e di concors

1) La presidence des comissions des garis e dai concors e je confidade ai Dirigjents daûr de dissipline dai regolaments di pueste. Se la gare e rivuarde lis competencis di plui uficis o servizis, la presidence de

comission e je confidade dal Segretari Gjenerâl o ben dal Diretôr Gjenerâl, se al è stât nomenât, al Dirigjent di un dai uficis interessâts.

2) La presidence des comissions di concors par assumi il personâl con cualifiche di dirigjent e je confidade al Segretari Gjenerâl.

3) Si dan fûr lis proceduris di apalt e concors e la stipule dai contrats a traviers lis formis fissadis, rispjetivamentri, dal regolament pe discipline dai contrats e dal regolament dai concors pal personâl provinciâl.

TITUL IV

DISSIPLINE DES FUNZIONI PROVINCIALS E DAI SERVIZIS

Art. 37

Normis in cont dal esercizi des funzioms

1) Lis normis che a dissiplinin il compiment des funzioms provinciâls si aplichin cence distinzions aes funzioms propriis, cun che l'ent al cure i interes e al promôf il svilup de comunitât provinciâl e a chês atribuidis e delegadis ae Provincie daûr des leçs dal Stât e de Regjon.

Art. 38

Modalitâts di gjestion

1) La assunzion di servizis publics che a vebin par ogjet la produzion di bens e ativitâts indreçâts a realizâ fins sociâi e a promuovi il svilup economic e civîl de comunitât, e je realizade, simpri che chês ativitâts no puedin jessi davueltis di ents privâts in regjim di concorince, daûr des modalitâts previodudis de leç e e je finalizade a sigurâ la regolaritât, la continuitât, la economicitât e la cualitât des prestazioms in condizions di avualance.

2) La siele des formis di gjestion e je fate, cuntun provediment motivât, dal Consei provinciâl, su la fonde di valutazioms di oportunitât, di convenience economiche e di eficacitât di gjestion, cun rivuart ae nature dai servizis di dâ fûr e ai concrets interes publics di perseguî. A chest fin, l'at al è compagnât di une relazion dal Colegjo dai Revisôrs che al valute i aspjets finanziariis e economics de propueste.

3) I rapuarts jenfri Provincie e gjestôr a son regolâts di contrats di servizi e, salf il câs straordinari di esercizi in economie dal servizi public, la Provincie e davuelç ativitâts di indreçament, di programazion, di vigilance e di control.

4) Cun di plui, il Consei provinciâl al dispon che a sedin garantidis periodichis verifichis e controis di cualitât in ordin ai servizis mandâts fûr e ancjemò formis di partecipazion e di control de bande dai utents.

5) Par mantignî la vigilance e il podê di indreçament costant sore i ents consorziâi o societaris dependents, vigilâts o partecipâts, si puedin nomenâ tant che rapresentants de Provincie dentri dai ents stès ançe membris dal Consei provinciâl o de Zonte. In chest câs nol constituîs cause di incompatibilitât la incjarie cjapade sù dal Conseîr o dal Assessôr intai

organismes di amministrazion dai ents controlâts o partecipâts de Provincie, che no compuarte podês di rapresentance o di coordinament.

6) Il Consei provinciâl, pal compiment di servizis sociâi, comprendûts i servizis culturâi e educatîfs, al pues costituî Istituzions. Cu la stesse deliberazion il Consei provinciâl al fâs bon il regolament de organizazion e des ativitâts che, fra l'altri, al fisse il numar dai components dal Consei di amministrazion, lis competencis dai orghins, lis carateristichis dal serviz, il conferiment di bens imobii e mobii e dal personâl, l'esercizi de vigilance de bande de Provincie.

7) Il Consei di amministrazion e il President des aziendis speciâls e des istituzions a son nomenâts e revocâts dal President de Provincie, su la fonde dai indreçaments fissâts dal Consei. A restin sù intant dal mandât eletîf dal President de Provincie e a compin lis funzions fintremai al logament dai sucessôrs.

8) Il Consei provinciâl al pues deliberâ che la gjestion di un serviz public e sedi fate a traviers di une societât par azions o a responsabilitât limitade e consorzis, costituîts di pueste, cuant che la nature dal serviz e fasi scrupulâ la oportunitât di une partecipazion di altris sogjets publics o privâts. Fûr di chest câs, il Consei al pues disponi la partecipazion dal Ent a societâts di capitâi, consorzis di impresaris, societâts consortîls o impresis cooperativis, che a vebin finalitâts di grande impuartance rispjet aes funzions e ai compits de Provincie. Il Consei al pues, cun di plui, disponi la partecipazion dal Ent a associazions, fondazions e comitâts che a perseguin finalitâts o interès provinciâi.

9) Il President de Provincie e cui che al rapresente la Provincie in ents consorziâi o societaris al riferis an par an al Consei provinciâl.

Art. 39

Colaborazion cu lis Comunitâts Montanis

1) La Provincie e colabore cu lis Comunitâts Montanis, cun particulâr rivuart ai intervencs di promozion des ativitâts produtivis, ae realizazion di voris infrastrutturâls, al valorizazion dal patrimoni culturâl e ambientâl.

Art. 40

Colaborazioni jenfri Provincie e Comuns

- 1) La Provincie di Pordenon e promôf, e jude e e sosten iniziativis e programs di cooperazion, union e fusion jenfri i comuns, cun chê di realizâ une integrazion tra di lôr, ancje tignint cont de legjislaçion regionâl particulâr.
- 2) Par realizâ i compits dal come cà parsore, i statûts des aziendis speciâls a puedin previodi formis particulârs di coordinament cu lis ativitâts dai comuns.

Art. 41

Colaborazion cui Comuns par areis funzionâls

- 1) Fatis salvîs lis funzions amministrativis di interès provinciâl che a rivuardin areis intercomunâls o dut il teritori provinciâl, cun relacion ai setôrs economic, produtîf, comerciâl, ambientâl, turistic, socio-culturâl e sportîf, la Provincie e ative rapuarts di colaborazion cui comuns su la fonde di programs che e propon pe elaborazion e pe esecuzion di programs in comun o pe realizazion di voris di grant interès provinciâl.
- 2) Pai fins dal come cà parsore si puedin previodi ancje formis consortilis.
- 3) La Provincie e organize servizis di elaborazion dâts e di assistence tecnico-amministrative intai confronts dai comuns, soredu chei plui piçui.

Art. 42

Formis di cooperazion

- 1) Il President de Provincie, fasint stât suntune delibare dal Consei Provinciâl, al soscrîf i ats che a coventin par realizâ formis di cooperazion rapresentadis di consorzis, acuardis di program e convenzions.
- 2) Par definî e realizâ voris, intervents o programs che a domandin une azion integrate e coordinade de Provincie e di altris ents o sogjets publics, la Provincie e promôf i acuardis che a coventin.

TITUL V

LA FINANCE E I CONTROI CONTABII

Art. 43

Programazion finanziarie

- 1) La programazion plurienâl, fondade su la sigurece des risorsis finanziariis propriis e trasferidis, e je cjapade sù de Provincie tant che argagn fondamentâl pal compiment des propriis funzions, in armonie cui principis dal gnûf ordenament finanziari e contabil.
- 2) L'esercizi de potestât impositive autonome, dentri de legjistazion tributarie in vigôr, e concôr ae definizion di risorsis siguris pe azion amministrative provinciâl.

Art. 44

Belanç anuâl e plurienâl

- 1) La Zonte e prepare il scheme di belanç anuâl di prevision, di belanç plurienâl e la relazion di prevision e ju presente al Consei par jessi fats bogns cuntune delibare che e à di jessi cjapade sù dentri dai tiermins previodûts de normative regionâl e cussì ancje eventuâls integrazions dal program di mandât.

Art. 45

Control di gjestion, la valutazion e il control strategic

- 1) La Zonte provinciâl e nomene une comission componude da Dirigjents dal ent, cun a cjâf il Diretôr Gjenerâl se al è stât nomenât o, se nol è, dal Segretari Gjenerâl, par sorestâ al control di gjestion.
- 2) La Zonte e nomene un Nusel di Valutazion, componût dal Diretôr Gjenerâl che 'ndi è a cjâf e di doi membrs sislzûts jenfri i dirigjents di altris aministrazions o aziendis o professioniscj esperts in technichis di valutazion e control, par sigurâ il davuelziment des ativitâts previodudis dal art. 6 dal D. Legjislâtif 286/1999, comprendudis chês di supuart pe valutazion dai Dirigjents de bande dal President de Provincie e la individuazion dai parametris e dai indicadôrs di doprâ pal control di gjestion.
- 3) Il regolament di organizazion al dissipline il control di gjestion, la nomene, il funzionament e i adempiments de comission e dal Nusel di Valutazion.

Art. 46

Colegjo dai Revisôrs

- 1) Il Colegjo dai Revisôrs, componût di tre membris, al è elet dal Consei provinciâl cun vôt limitât a dos components sielzûts jenfri personis fûr dal Consei.
- 2) Il Colegjo dai Revisôr al sigure la regolaritât contabil e finanziarie de gjestion de Provincie e al proviôt, oltri ai adempiments de leç, a presentâ al Consei provinciâl une relazion semestrâl, con particolâr rivuart ai cors de casse a furniment de verifiche dai ecuilibris di bilanç previodude dal art. 193 dal T.U. 267/2000.
- 3) Ogni Revisôr al pues jessi revocât dal Consei daûr di circostanziade contestazion di inadempiments fats de Zonte e dopo di vê valutât eventuâls justificazions predentadis.
- 4) Il Colegjo al colabore cu la comission sorestant al control interni di gjestion, in particolâr par definì i parametris di capacitât, di eficacitât e di economicitât di aplicâ inte azion amministrative.

Art. 47

Leament jenfri Consei e Colegjo dai Revisôrs

- 1) Il Colegjo dai Revisôrs al colabore cul Consei intes funzions di direzion e di control. Cheste colaborazion si le fâs daûr des modalitâts dal regolament consiliâr previodût dal art. 21 dal Statût presint.

TITUL VI

NORMIS FINÂLS E TRANSITORIIS

Art. 48
Modifichis al Statût

- 1) Lis propuestis di modifichis al Statût presint a son deliberadis daûr des modalitâts dal art. 6 come 3 dal T.U. 267/2000.
- 2) Lis propuestis di modifichis rifudadis dal Consei provinciâl si puedin tornâlis a presentâ passâts almancul sîs mêis de votazion.
- 3) La delibare par revocâ dal dut il Statût presint si le pues cjapâle dome cu la adozion dal test dal gnûf Statût; la revoche e tache il dì che al jentre in vigôr il gnûf Statût.

Art. 49
Jentrade in vigôr dal Statût

- 1) Il Statût presint, passât il control di legjitimitât, al è publicât intal Boletin Uficiâl de Regjon e al è afis intal album provinciâl par trente dîs seguitîfs.
- 2) Il Statût presint al jentre in vigôr il trentesim dì seguitîf ae sô afission al album de Provincie.
- 3) Il Segretari Gjenerâl dal ent al firme insom al originâl dal Statût la certificazion de date di jentrade in vigôr e de publicazion efetive daûr des formis dal prin come e 'ndi mande une copie al Ministeri dal Interni par jessi metût dentri de racuelte dai statûts.